

Morning Dogri (NSD) National News Bulletin 12-05-2025

आकाशवाणी

- आपरेशन सिंदूर तैहत पाकिस्तान ते पाकिस्तान दे नजैज कब्जे आले जम्मू कश्मीर च लक्ष्य बनाइयै कीते गेदे हमलें च 300 कोला मते आतंकवादिएं गी मारी मकाया गेआ ऐ।
- लैफ्टिनेंट जनरल राजीव होरें आखेआ ऐ जे भारत ते पाकिस्तान दे डीजीएमओ बश्कार अज्ज दपैहरी 12 बजे गल्लबात होग। इस दरान दौनें मुख्यें बश्कार सैहमति गी लम्मे समें तोड़ी बनाई रखने दे तौर तरीकें पर सोच बचार कीता जाग।
- राश्ट्रीय जांच अजेंसी एनआई नै खालिस्तानी कश्मीर सिंह बलवड्डी गी गिरफ्तार करी लैता ऐ। एह 2016 च नाभा जेल थमां फरार होई गेआ हा।
- गौतम बुद्ध हुंदे जन्म ध्याड़े दे तौर पर अज्ज बुद्ध पूर्णिमा मनाई जा करदी ऐ। राश्ट्रपति ते उपराश्ट्रपति होरें इस मौके पर शुभकामनां दित्तियां न।
- अमरीका नै जंदी रातीं स्वीजरलैंड दे जेनेवा च चीन कन्नै इक बपार समझौता होने दी घोषणा कीती ऐ।
- भारत नै कल चीन दे शंघाई च तीरंदाजी विश्व कप स्टेज-2 दे मकाबले च दऊं सुन्ने दे, इक चांदी दा ते चौर कैह दे तगमे समेत कुल 7 तगमे जित्तियै अपना अभियान समाप्त कीता ऐ।

<><><><><><><>

DGMO Briefing

भारतीय सेना दे फौजी कारवाइएं सरबन्धी महानिदेशक डीजीएमओ लैफ्टिनेंट जनरल राजीव घई होरें आखेआ ऐ जे आपरेशन सिंदूर दे तैहत पाकिस्तान ते पाकिस्तान दे नजैज कब्जे आले जम्मू कश्मीर च 9एं आतंकी ठकाने पर हमले कीते गे। इनें हमलें च 100 कोला मते आतंकवादी मारे गे। कल नमीं दिल्ली च समाचार माध्यमें गी जानकारी दिंदे होई डीजीएमओ होरें आखेआ ऐ जे इनें आतंकवादिएं च यूसूफ अजहा, अब्दुल मलिक रऊफ ते मुदासिर अहमद जनेह आतंकवादी शामिल हे।

उनें आखेआ जे आपरेशन सिंदूर दी अवधारणा आतंकवाद दे अपराधिएं ते योजना बनाने आलें गी सजा देने ते उंदे आतंकी ढांचे गी तबाह करने दे मकसद कन्नै कीती गई ही। राजीव घई होरें आखेआ ऐ जे भारत ते पाकिस्तान दे डीजीएमओ नै अज्ज दपैहरी 12 बजे गल्लबात करने दा फैसला कीता ऐ तां जे इस सैहमति गी लम्मे समें तोड़ी बनाई रखने दे तौर मरीके पर सोच बचार कीता जाई सकै। उनें एह जानकारी दित्ती जे सेना प्रमुख जनरल उपेन्द्र द्विवेदी होरें पाकिस्तान आस्सेआ कुसै बी खलाफवर्जी दे मामले च जवाबी कारवाई लेई फौज दे कमांडो गी पूरा अधिकार दित्ते दा ऐ। डीजीएमओ होरें आखेआ जे 7 कोला 10 मई बश्कार कब्जा रेखा पर तोपखाने ते जौहके थेआरें कन्नै गोलीबारी च पाकिस्तानी फौज दे तकरीबन 35–40 कर्मी मारे गे। एयर मार्शल भारती होरें आखेआ जे जित्थें नुकसान पजाया जाई सकदा हा उत्थें हमला करने दा फैसला कीता गेआ ते भारतीय वायु सेना नै पाकिस्तान दे ब्हाई ठकाने, कमांड सेंटरें, फौजी बुनियादी ढांचे ते वायु रक्षा सरिस्ते पर हमला कीता गेआ। भारती सेना नै आखेआ ऐ जे जम्मू कश्मीर ते अंतर्राष्ट्रीय बनने उप्पर रातीं शांति बनी दी रेई। फौज नै दज़स्सेआ ऐ जे एल्लै तोड़ी कुसै घटना दी कोई सूचना नेई ऐ। फौज नै गलाया जे हाल दे दिनें च एह पैहली शांत रात ही।

<><><><><><>

NIA

राष्ट्रीय जांच अजेंसी एनआईए नै खालीस्तानी आतंकी कश्मीर सिंह गलवड्डी गी गिरफ्तार कीता ऐ। एह 2016 च नाभा जेल थमां फरार होई गेआ हा। एनआईए नै इक ब्यानै च दस्सेआ ऐ जे एह सफलता उसलै हासल होई जिल्ले बिहार दी मोतीहारी थाहर थमां कश्मीर सिंह गलवाड़ी गी फगड़ेआ गेआ। अगगे दस्सेआ गेआ ऐ जे नाभा जेल थमां फरार होने मगरा ओह खालीस्तानी आतंकवादिएं जिंदे च रिंदा बी शामिल ऐ, कन्नै सक्रिय तौर पर जुड़े दा हा। अजेंसी नै दस्सेआ ऐ जे बब्बर खालसा इंटरनेशनल ते नेपाल च रिंदा दा आतंकी ग्रुप कन्नै जुड़े दा कश्मीर सिंह एनआईए मामले च घोषत अपराधी हा। ओह षड्यंत्र रचने, पनाह देने, मदाद पजाने ते आतंकवादिएं गी रपया पैसा पजाने दे कम्में च अपराधें च शामिल हा।

<><><><><><>

Budh Purnima

अज्ज बुद्ध पुर्णिमा मनाई जा करदी ऐ। अज्जै दे दिन गौतम बुद्ध हुंदा जन्म होआ हा, कन्नै गै उनेंगी बोधगया च महाबोधी दरख्त हेठ निर्वाण दी प्राप्ती होई ही। बुद्ध पूर्णिमा भारत, नेपाल, भूटान, बर्मा, थाईलैंड, तिब्बत, कोरिया, मंगोलिया, वियतनाम, कंबोडिया, सिंगापुर, इंडोनेशिया ते श्रीलंका दे बौद्धें ते हिंदुएं दा इक मुख्क ध्यार ऐ।

<><><><><><>

US-China

अमरीका नै जंदी रातीं स्वीजरलैंड दे जेनेवा च चीन कन्नै इक बपार समझौता होने दी घोषणा कीती ऐ। व्हाइट हाउस आस्सेआ जारी इक ब्यान च आखेआ गेआ ऐ जे चीन कन्नै गल्लबात बड़ा रचनात्मक रेई ऐ ते समझौते दा बयोरा अज्ज सांझा कीता जाग। उनें इस गललबात दी मेजबानी करने लेई स्वीजरलैंड दी सरकार दा बी धन्नबाद कीता। अमरीकी बपार प्रतिनिधि जेकिसन ग्रोर होरें आखेआ जे असें चीनी भ्याल कन्नै इक समझौता कीता ऐ जेहड़ा 1.2 ट्रिलियन अमरीकी डॉलर दे बपार घाटे गी घट्ट करने च मदद करोग।

<><><><><><>

Jaishankar

विदेश मंत्री डॉ. एस.जयशंकर होरें मिस्र दे विदेश मंत्री बद्र अब्देलअती हुंदे कन्नै फोन पर गल्लबात कीती ऐ। डॉ. जयशंकर होरें इक सोशल मीडिया पोस्ट च दस्सेआ जे उनें मिस्र दे विदेशमंत्री होरें गी हाल दी घटनाएं बारे जानकारी दित्ती ते कुसै बी चाल्ली दे आतंकवाद खलाफ उक्का बी बर्दाश्त नेई करने आली नीति अपनाने दे महत्वै पर जोर पाया। दौनें लीडरें भारत ते मिस्र बश्कार आर्थिक सैह्योग दी संभावनाएं पर गल्लबात कीती।

<><><><><><>

NDMA

राष्ट्रीय आपदा प्रबंधन प्राधिकरण एनडीएमए नै नागरिकें गी सलाह दिंदे होई आखेआ ऐ जे ओ कुसै बी बेपछानू विस्फोटक सामग्री गी नेई छून।

सोशल मीडिया पर इक पोस्ट च नामानै आखेआ जे विस्फोटक समेयान खतरनाक होई सकदा ऐ ते लोकें सख्त जख्मी जां मौत दा कारण बी बनी सकदी ऐ। एनडीएमए नै गलाया जेकर लोकें गी कोई बेपछानू सामग्री थ्हांदी ऐ ते तुरत मकामी अफसरें गी सूचित करन।

<><><><><><>

Sports

तीरंदाजी दे विश्व कप मकाबले दे दूए चरण च भारत नै अजें तगर दऊं सुन्ने, इक चांदी ते कैह दे 4 तगमें कन्नै कुल मलाइयै 7 तगमे जित्ते न। चीन दी शंघाई थाहर चला करदी इस प्रतियोगिता च कल भारत दे पार्थ सुशांत सुलंखे नै मर्दे दे रिकरव वर्ग च कैह दा तगमा जित्तेआ ऐ, जेह्दे के महिला वर्ग च दीपिका कुमारी कैह तगमा जित्तेआ ऐ। पाथ सुलंखे नै फ्रांस दे खड़ारी 6-4 कन्नै ते दीपिका कुमारी नै कोरिया दी खडारन गी 7-3 कन्नै हराया। विश्व प्रतियोगिता दे त्रीआ चरण अंतालेया च 3 जून थमां 8 जून तगर आयोजित कीता जाग।

<><><><><><>

International Nurse

अज्ज अंतर्राष्ट्रीय नर्स ध्याड़ा मनाया जा'रदा ऐ। आधुनिक नर्सिंग दी नींह रखने आली फ्लोरेंस नाइटिंग गेल हुंदे जन्म ध्याड़े गी मनाने लेई एह ध्याड़ा मनाया जंदा ऐ।

<><><><><><>

Delhi Airport

दिल्ली ब्हाई अड्डे पर कम्मकाज समान्य ढंगै कन्नै चला करदा ऐ। इक एडवाइसरी च दिल्ली अंतर्राष्ट्रीय एयर पोर्ट लिमिटेड नै उआं आखेआ ऐ जे मजूदा हालात दे चलदे ते सिविल हवाबाजी सुरक्षा सरबंधी ब्यूरो पाससेआ निर्देशित सुरक्षा उपाएं दे चलदे किश ब्हाई ढोआरिएं उप्पर असर पेई सकदा ते सुरक्षा सरबंधी प्रक्रियाएं च मता समें लग्गी सकदा ऐ। एह आखेआ गेआ ऐ जे मुसाफरें गी अपनी एयरलाईन कंपनिएं कन्नै राबता रखन ते दस्से गेदे दिशा निर्देशें दा पालन करन।

मुसाफरें गी एह बी सलाह दित्ती गई ऐ जे ओह ब्हाई अड्डें पर पैहले पुज्जन, सुरक्षा कर्मिण कन्नै सैहयोग करन ते दिल्ली एयर पोर्ट दी वैबसाइट कन्नै राबता रखन ते डोआरिएं सरबंधी ताजा जानकारी हासल करन। मुसाफरें गी सेई सूचना लेई अधिकारिक सूचनाएं उप्पर गै भरोसा करने ते गैर तकशीद शुदा सूचनाएं थमां दूर रौहने लेई सलाह दित्ती गई ऐ।

<><><><><><>

Women Cricket

महिला क्रिकेट च भारत दी टीम नै श्रीलंका दी टीम गी 97 रंज कन्नै हराइयै त्रुं मुख्यें दी इक रोजा श्रृंखला जित्ती लैती ऐ। कल कोलंबो दे आर.प्रेमदासा स्टेडियम च खेड्डे गेदे फाइनल मकाबले च पैहले बल्लेबाजी करदे होई भारत नै 7एं विकेटें दे नुक्सान उप्पर 342 रंज बनाए, जेह्दे च उप-कप्तान समृति मंदाना दे 116 रंज शामिल हे, उसी मैन आफ द मैच दित्ता गेआ।

<><><><><><>

IMD Weather

भारत दे मौसम सरबंधी मैहकमे नै पच्छमी बंगाल ते सिक्किम दे किश इलाकें च भारी थमां बड़ी भारी बरखा दी पेशगोई कीती ऐ। मौसम विभाग मताबक उत्तर-पूर्व मध्य ते दक्खन भारत च तेज हवा कन्नै ते गरज चमक कन्नै तूफान दी पेशगोई कीती ऐ। मौसम विभाग नै असम, मेघालय ते पंजाब दे टांवी-टांवी थाहरें पर ऐनगड़े पौने दी भविक्खवाणी कीती ऐ जिल्ले के बिहार दे किश थाहरें च पच्छिम बंगाल ते सिक्किम च टांवी-टरंवी थाहरें पर लूह चलने दी पेशगोई कीती ऐ जिल्ले के घाखंड, केरला, माहे, तमिलनाडू ते पुदुचेरी च गर्म ते हुम्म आला मौसम रौहग। मौसम विभाग नै अगले 7एं दिनें तगर मध्य भारत च बद्धोबद्ध तापमान च. 2 थमां 3 डिग्री सैल्सियस दा बाद्धा होने दी संभावना दस्सी ऐ।

<><><><><><>